


Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.245



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.245



Early European Books, Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.245



Early European Books. Copyright © 2012 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 2.3.245

2. 3. 245




2
3
945
PANEGYRI

CVS IOANNIS PEL
LISSONIS CONDRIA

centis, Optimo, atq; laudem
omne supergresso
Cardinali

FRANCISCO A' TVRNONE
dictus.

De summi Pontificis Rhomani, CLEMENTIS eius
nominis septimi, ad Christianissimum regem, in
terram Franciam, magnifico aduetu, eius-
demq; triumphali in urbem Mas-
siliam acceptione.



VIRTUTE DVCE,



COMITE FORTVNA.

LVGDVNI APVD SEB.
GRYPHIVM,

M. D. XXXIIII.

Ex legato D. Equib; Antonij Francisci de Marigny

2
IOAN. PELLISSO COND.
AD LECTOREM.

Qui primus dubijs permisit carbasa uentis,
Se satis infido credidit ille mari.
Sed quia tranquillo pertingere littora cursu,
Tempestatum expers, principio potuit,
Omnia tuta ratus, tumidas non horruit undas:
Sed neq; fluctuagi numina læua Dei.
Sic residem calamum præceps audacia sumens,
Quiuit ab ardenti pellere corde metum.
Tantum, quod primo aspirauerit aura labori,
Nec fuerit sæuis hæc ratis acta Notis.
At tu da ueniam, incultum lecture libellum,
Et dare quo posthac sit meliora, faue.
Scis magnos candore hominum euasisse poëtas,
Sæpe, quibus fuerat debile principium.


IOAN. PELLISSO

CONDRIACENSIS GRAVISSIMO

pariter humanissimoq; principi suo,

Claudio à Turnone, Viuariensi

episcopo, S. P.



VAE isti tam incredibili humanitati, tuo tam uiro principe digno candori, immortales gratias ago, amplissime præsul, quòd humili clienti alumnoq; tuo mihi, uel ab amplitudinis tuæ comitatu digresso, tam amanter tribuas, quantū quidem ut optare fortasse aliquando potuerim, certè sperare nunquam sum ausus. Equidem non quòd charissimo nepoti tuo à prælectionibus, rerumq; excolendarum memoria parum lubens essem, isthinc propterea ut discederem, faciundum putauī: Sed quod id iam prouinciæ grauius ac difficilius mihi euaderet, quàm cui amplius administrando par esse possem. Quod si quis in re alia usus mei ulla (quod æquum & optabile fuit) dignitati tuæ futurus uideri potuisset, tametsi nullam occasionem prætermisissē usquam uideor, qua non ipsa re declarauerim, quantopere honestissimæ uoluntati tuæ morem gerere semper cupiam: Tamen adhuc testatius aliquanto fecissem, sic tuam me præstantiam obseruare ac reuereri, ut quiduis perpeti potius habuissem, quàm ut eam (quod quidem in me esset) sciens offenderem. Quanquam infelicitati cedens ad tempus secessi uerius, quàm discessi. Necq; enim ad alium quem patronum me contuli. Cum non defuerint (sit Christo gratia) qui non pœnitendam conditionem mihi offerrent. Sed nec ullam animi à te antistite & ornatore meo alieni significationem dare uolui. Nec facere etiam potui, quin tanquam certo sperarem, ut adhuc etiam ualidius spero, te mei rationem aliquando tandem habiturum,

a 2 rum,

rum,quippe haudquaquam inscius,quàm sis ipsa ingenij bonitate ad bene merendum propensus, de ijs præsertim qui tibi in famulatu probos se ac frugì probauerint. Quandoquidem nec ullius prorsus in pietatem tuam admittæ culpæ mihi conscius sum,& nihil non & feci,& passus sum, & quidem rei meæ dispendio (id quod prudentia tua non ignorat) alicubi etiam magno uitæ periculo,ut uerus amor ad omnia fortis est,quo imperata ac mandata tua sedulo magnacq; fide obirem atq; exequerer. Ac ne nunc quidem in uotis quicquam magis habeo,duntaxat secundum ea,quæ ad salutem æternam pertinent,quàm ut per literarum studia tempore mihi detur,quo synceri erga te,& uniuersam à Turnone familiam amoris mei, aut potius pietatis ex ingenioli fructu specimen aliquod edam. Et sanè hoc ipsum animulo huic adeo penitus infixum est,ut quum meam quandam ad magnificentissimum patrem, Cardinalem à Turnone, gratulatoriam orationem, de illius Rhomana legatione in patriam reditu,à te tanto & tam singularis ingenij,tam acris in literis & rebus omnibus iudicij uiro antistite, in tantum probatam meminerim, ut eius edendæ mihi etiam autor esses, eadem typographis tradenda, famæ periculum adire non dubitauerim: & quidem securus omnium, sed non alio,quàm quod ei scilicet albus abs te calculus eo modo adiectus esset. Nam tametsi mihi nonnihil uerendum fuit, ne quid huic audaciæ succenseret grauissimus, idemq; ut in omnibus, ita in eloquentia quoq; eminentissimus Cardinalis à Turnone, quia non conueniat summi uiri laudes à quouis celebrari, quem admodum nec nisi Apelli Coo Alexandrum Magnum pingere licuit. Sum enim (quod dissimulare non queam) uel infra eorum infimos, qui aliquo ingenij & exercitationis beneficio non omnino barbarè dicere utcunq; norunt. Tamen nequis talis scrupulus me male haberet, prohibuit statim, quod uenit in mentem, quantum amplissimus ille amplitudini tuæ deferat, quantumq; honoris eidem habeat, qui nulli tuorum

5
tuorum propter te non amantissimè faueat, uir non dubiè
optimus & humanissimus, ut quisquam in hac ætate esse po-
test. Hoc enim mecum considerans, potius mihi sperandum
censui, idcirco panegyricū hunc illi gratum futurum, quia
eum inclyto nomini tuo dedicatum, auspicijs tuis in publi-
cum exiisse cognouerit: & quoniam in promptu etiam fue-
rit illud, Voluisse in magnis, satis esse. Certè quidem subdis-
ti hominis & principum suorum, studiosi uirtute atque offi-
cio, quantum in me fuit, diligenter fungi conatus sum. Cu-
iusmodi ministerium temeritatis damnari non debet, nisi
iam in eorum albo forte adscriptus sum, qui hoc ipso maxis-
mè displicent, quòd placere, esseq; in gratia student. Quò
infelicitatis si mea incurrerit aut impegerit, non tam ani-
mosa, quàm non dubiè pia sedulitas, obtestanti Christus
mihi (spero) aderit, ne posthac unquam in simile peccatum
relabar, sed quiduis potius faciam quàm ut iterum id faciā.
Dicerem autem de præclarissimis laudibus tuis, Ornatissi-
me Præsul; Sed id argumentum mihi sepositum est in com-
modius tempus, & in iustum uolumen, quum illustrissimæ
gentis & familiæ à Turnone, res adiutore Deo, altius repe-
tens, historia aliqua complecti meditabor: si hoc modo lar-
giri dignabitur deus, ne omnino infelicitè hic mihi ce-
dat uela uentis permisisse quò fiat animus, & profectus
augeat, summa ope ad meliora & politiora enitenti,
nec hunc ingenij luminis extinctorem metum acci-
pere semper, sit hoc pacto necesse, nimia superstitione
periculum cogitanti, nequid non satis elaboratum & ex-
cultum emittam, ne ue rudioris ingenij culpa ac uitio
honestas alioqui & huberes materias deteram, aut etiam
labefactem. Nunc hoc tanquam talis animi pignus quod-
dam, quali soles quæcunque è grato tuorum animo pro-
ficiscuntur, hilari fronte accipe, & semper bene uale. Anti-
stes humanissime, Dominus deus noster I E S V S C H R I S-
T U S

S T V S amplitudinem tuam cœlesti favore ubique pro-
sequatur. Lugduni Nonis Iulijs, Anno à uir-
ginis partu, sesquimillesimo triges-
simo quarto.

AD ILLVSTRIS

SIMVM, EVNDEM'QVE IN
omni laudum genere eminentissimū
Cardinalem, Franciscum à Tur
none,

IOANNIS PELLISONIS
CONDRIACENSIS PA
NEGYRICVS.



QVOD à Deo optimo maximo, ardētibus uotis toties comprecati sumus, desyderatissime pater, ut quando te nostrum præsidium, nostrumq; dulce decus esse uoluit, tam longinquam, tamq; difficilem profectionem istam, quàm Christianissimi regni status tuendi, ornandi, ampliandi gratia, meritò suscipiendam putasti, ita prosperam, atque ita sine ulla offensione prorsus esse, etiam uellet, ut re feliciter gesta, te breui reducem uenerabundi exciperemus: Hoc immortalī illius beneficio, nobis tandem contigisse, tam effusē ciues clientesq; tui omnes lætamur, tamq; inusitata quadam uoluptate delibuti exultanter gestimus, ut uotorū omnium summam cōsequuti nobis quodam modo uideamur.

Necq; enim dici potest, Antistes amplissime, quàm
a 4 miserè

miserè de salute tua solliciti usque fuerimus, ne quid tibi Romana ista peregrinatione humanitus accideret, dum uidelicet hinc quidem, summa (quod Ouidius ait) petere inuidiam, sicut ardua perflare uentos solere, in mentem ueniebat: inde uerò, tot & tam uaria pericula succurrebant, quibus obnoxia est mortalis uita. Quod & si legationem te suscepisse, & decoram, & ad immortalem gloriã, tibi opportunissimam futuram, satis intelligebamus: non poteramus tamẽ, quin summum metum cum ingenti spe uelut admiscentes coniungeremus: Tum autem seculum uidebatur nobis exiisse, postquã dulcissimo conspectu tuo tandiu frui nō liceret, ac sine te apud nos tam multa nescio quo modo iacere uidebantur, quæ tua præsentia splendorem suum ac dignitatem retinent.

Atq; utinam miserorum querelas alicunde inaudisses, cordatissime pater, quibus te absente aut labor obiectus, negotiumq; aliquod immerentibus exhibitum, aut in regia æquum bonum ægrius persequendum, atque eblandiendum fuit, pia illorum uox è tenero tui desyderio erumpens, tibi qui patronum, intercessorem, deprecatorem, nulli te in re honesta & iusta denegare soles, magis ac magis confirmasset ita esse, quemadmodum uulgo dici solet, nihil omnino tam charum esse posse, quod non charius longe fiat, si aliquantisper ab oculis diligentium subducatur: usq; adeò scilicet in prædicandis uirtutibus & benefactis tuis, quum ijdem multissimi uideri possent, tamẽ sibi
in eo

in eo satisfacere non poterant.

De literatis uerò, ijs præsertim, qui musarum sacra colunt, quid tibi nouum aut inopinatum narrare possim, sapientissime Pater? quos non nescius es, amplitudini tuæ in tantum usque quaque addictos & obnoxios esse, ut te suum meccenatem uno ore omnes prædicent: Gratiâq; ac ueneres, & lepôres, denique camœnas suas ex te uno pendere omnes, ad te unum respicere, tibiq; uni consecratas esse profiteantur. Scilicet & hi aduentum tuum flagrantibus uotis animisq; expectabât, ac sine te suas musas negabant canoras esse posse, nihilo magis, quàm cygnos & ipsos Apollini sacros, non spirante Fauonio. Quid uerbis opus est? ista tua nimirum longior absentia, apud omnes & infimos, & medios, & summos, desiderium tui tantum excitauit, fortunatissime antistes, ut facillime appareat, nihil in omni mortalium actione inesse quicquam, unde maiora commoda, amplior dignitas, solidior gloria proficiscatur, quàm si de quàm plurimis queas, optime merearis, honestisq; rationibus semper studeas & conere, omnibus (quantum in te sit) penitus esse cordi, nec dubium uideatur, quin tametsi animi tantum, non etiam reipublicæ causa, ita diu atq; ita procul peregrinari & abesse libuisset, tamen non nisi & festiuissimus & candidissimus fuisset dies ille futurus, quum primum Franciæ reddereris saluus.

Etenim in te nescio quo modo, præter cæteros peculiariter

culiariter elucet, tam amabilis naturæ & ingenij bonitas, tam mellita quædam morum & suauitas & facilitas, & hæc quidem rara quadam animi prudentia, & pia maiestate condita ac temperata, ut quum in administrando sanctissimo munere apostolico, quum in obeundis negotijs publicis, uno te nihil sit religiosius, incorruptius, dexterius, felicius: tum te ipsum iuuandis, prouehendis, ornandis omnibus, tam obuium & paratum, tam comem & facilem præbeas, ut clarissima omnium uoce nusquam non prædicetur: Turnonio cardinale non modo nihil reperiri elegantius, & splendidius, sed nec esse quidem quicquam popularius & inculpatius.

Quo maiore proculdubio uoluptate, atque hu-
beriore gaudio perfruimur, qui te talem patronum,
talem protectorem ac defensorem, talem principem ac pastorem in patriæ sinum diuino beneficio nobis feliciter receptum conspiciamus. Et quod nulla ratione factum iri posse, quibusdam uidebatur, ut summus Pontifex Romanus tuo ductu, tuisque auspicijs Mafsiliam adueniret: Quum mira quadam fatorum indulgentia, res in magnifica illa legatione tua, ita secundæ ac prosperæ tibi fuerint, ut eam legationem ad maximi ipsius CHRISTI uicarij, regisque Francorum Christianissimi, addam & totius Franciæ nutum uotumque, neque secius eo, in eiusdem CHRISTI honorem feliciter obieris, indeque non corpore modo uegetior ac ualentior

tior (qui est C H R I S T I in eximiam pietatem tuam
 luculentus fauor) uerum etiam spe, quam de te con-
 ceperamus summam, longe superata, omnibus ani-
 mi fortunæq; dotibus cumulatior, ornatior, felicior
 ad nos redieris; Ex hoc tanto illius ipsius legationis
 tuæ successu, tantos spiritus ducere adeò nihil uere-
 mur, ut quasi longe extra omnem fortunæ aleam
 constituti, propter te unum utiq; tam felicem & bo-
 num patriæ huius nostræ parentē, de nobis ipsi ma-
 gnificulè & sentire & passim etiam loqui nihil dubi-
 temus. Quippe ita à natura informati affecti q; , ut
 quoniam reduci tibi ab uniuerfa Francia, certe ab re-
 ge ipso, & uniuersis tum aulicæ nobilitatis, tum eccle-
 siasticæ dignitatis summatibus, Massiliæ pridem tan-
 tus honos habitus est, ut is iustus triumphus in spe-
 ciem uideri possit, nos etiam seriò triumphare, aut
 certe tuum triumphantis currum prosequi, tuamq;
 gloriam nobis magnæ gloriæ ducere debere ipsi pu-
 temus.

Quid ni enim faciamus, quādo nullo reprehē-
 nis periculo Parentū germani filij, Præceptorum stu-
 diosi discipuli, Patronorum officiosi clientes, Orna-
 torū non ingrati beneficiarij, gloriam in se quadāte-
 nus deriuare audēt, & hac gratia illorum decora, ma-
 gna alacritate celebrare nusquam desinunt, ferrum
 etiam stricturi, si quis reclamare seu obstrepere uelit.

Nam quod ad ipsum triumphum attinet, Quæ
 uis dicendi, quæ orationis facultas & copia esse po-
 test

test cuiquam tanta, felicissime Antistes, ut pro rei dignitate uerbis explicet, quàm singulari fauore, quàm pleno gaudio, quanto cum honore, te Rex Cristianissimus reducem excepit? Quanto te de ista tam feliciter obita legatione, à se impèsius amari idem ostendit? cum te tamen semper in oculis tulerit. Præterea quāto plausu, quāta cū ueneratione, tibi tot augustissimi patres purpurati, tot agminatim ornatissimi præfules, tot cateruatim illustrissimi ex omni genere optimates, saluum te, & uoti compotem aduenisse, lætari se ac gaudere citra fucum testati, pro se quisque certatim laudibus in cœlum euexerunt? Proinde quàm faustis ominibus, quàm lætis acclamationibus, quàm pijs adprecationibus illo eodem die perstrepuerunt omnia, quo Franciæ uidelicet toti in summi pontificis expectationem erectæ, non alius candidior lætitiæque ac uoluptatis plenior dies, & quidem auspicijs tuis illuxit, nempe Rhomano ipso pontifice, summo CHRISTI uicario Mafsiliam appulso, cuius aduentui à quibusdam tantopere diffidebatur.

Enim uerò gloriam istam ego uel magnificis illis ac sumptuosis triumphis longè prætulerim, Ornatissime antistes: Quibus suos olim dictatores & consules, Rhoma mundanæ gloriæ ac potentiae adusque insaniam famelica, deuictis hostibus, aut subactis nationibus ornabat: sic ut nec esse rear quenquam, qui modò cor habeat, qui non istis factis ac meritis, rebusque & euentis similibus, nomen illustrari suum
multo

multo malit,quàm quibus triumphatores illi ueteres magnificentissimi, sese consequi ingenti ambitione sperabant,ut sua æternitati fama & Imperium consecrarentur.

Nempe quod sanguinarij illi, quasi in cōmunem humanarum gentium perniciem facti, nihil aliud laborare ac studere uidebātur,nisi ut cum aliena iactura locupletiores,& potentiores fierent,& quàm longissimè possent,suæ ditionis uiolentissimæ pomeria proferrent. Qui animus,quodq; eorum tam execrabile uotum ut penitus expleretur,tantam mortalium stragem, tantas urbium subuersiones atque excidia, tantas populorum clades & internecciones, tantas urbium uastitates fieri atque edi oportebat,ut mirum nulli esse debeat, si diuina tandem ultione uetus illa Quiritum maiestas, ne pilum quidem dignitatis suæ ac potestatis hodie retineat.

Cum tu modis omnibus suspiciende pater,contra tanquam ad communem orbis Christiani salutem & pacem, hoc est ad subleuandas exulceratissimorum temporum calamitates & miserias natus, quascunq; res Francorum regis nomine gessisti, eas bono publico,& totius Christianitatis commodo, sedandis & amoliendis bellorum furijs, & efficacissimo persuasui,tempestiuiscq; admodum officijs,redigēdis in gratiam potentissimis Christianorum monarchis, sanctissimè ac felicissimè gesseris: ut certissimo certius sit,non temere esse,quod sic diligaris atque obserues

b 3 re:quodq;

re : quodcūq; tanto honore , tantaq; gloria ubiq; flo-
reas. Atque illud magis ac magis cuius detur intel-
ligi, Caput in omni re esse, quamplurimis prodesse &
bene consulere, nec quicquam prius seu antiquius,
primarijs & principibus uiris ducendum habendū-
q; quā ut in omnibus ac per omnia, & fide, &
diligentia maxima, CHRISTI negotium agatur.

Quippe non posse non prosperè adeoq; ex animi
sententia succedere & domestica, & publica omnia, si
factum auspicium inde fuerit.

Nam præclarissima illa, quibus celebrandis alius
dicendi peritus opportunè suam facultatem & co-
piam ostentare posset, ueluti iam inde ab antiquissi-
mis temporibus, consecratam originem uestram, &
ad deos autores referri solitam esse, uenisseq; olim in
hanc Galliarum partem, è sanguine Troiano Hero-
um progeniem longe præstantissimorum, in queis
fuisse Turnum quendam, non Italum illum scilicet,
qui in singulari certamine Aeneæ magni dextra occu-
buit, sed alterum quendam uerè Troianum, atque
adeò Hectoris ipsius filium, qui uobis generis au-
tor fuit, nomenq; dedit, & gentilitia insignia. Hunc
enim in agro, qui iam inde ab eo tempore, uestræ di-
tionis est, consedissee, urbemq; de nomine suo condi-
dissee Turnonem, & filios reliquisse, inclytam propa-
ginem ac stirpem uestram, unde uos longa serie,
atque longo ordine prognatos, constantem famam
& continentem esse : quæ semper tanquam per ma-
nus

nus talis ad posteros transmissa sit: Confirmariq; hoc minimè leui argumento, quòd in altera gentili-
tiorum insignium uestrorum parte, generosum ac fe-
roce leonem, nempe hiantem & erectum, atque ad
prædam expansum gestatis, clarissimi Hectoris in-
signe. Fuisse itaque maiores uestros heroas bellica
gloria florentissimos, & hoc nomine semper in Gal-
licorum regum familiaritatem adscitos, semperq; ma-
gnis honoribus usos. Hoc etiam ex eo satis liquere,
quòd altera insignium uestrorum pars, tota floribus
lilijs sparsa sit, & referta.

Tales igitur prisca illa ætate maiores uestros fuis-
se, quales in deorum numerum referre etiam Rhoma-
nis solenne fuit: neq; huic demum tantæ, & prorsus
hæreditariæ gloriæ quidquam decessisse, posteaquã
Christianismus inoleuit, sed plurimum accessisse
potius. Prodiisse enim etiam id temporis, è genere ue-
stro, qui per singularem uitæ sanctimoniam, tot mi-
raculis & tantis orbi inclaruerunt, ut post hanc mor-
talem uitam, autore CHRISTO, indigetes decla-
rati, sibi sumptuosa ædificari templa, sibiq; sacras ac
solennes nuncupari ferias sint promeriti. Quod qui-
dem pro certo dici, nec commentum esse, quum alia,
tum antiquam apud Lugdunum diui Iusti ædem,
opulentumq; ac uenerabile inibi canonicorum sacer-
dotum collegium in medio esse, ac testari. Extare &
in Turnonia arce, extructarum ab eodem diuo Iusto
ædium corpus, monumentum Religiosa quadam

b 4 anti

antiquitate uisendum, & sancto diui ipsius domicilio planè uenerandum : à quo diruendo & innouando, non iniuria ob sacram memoriæ dignitatem semper abstinendum censuistis. Pie sanè ac religiosè, quem admodum & illud antiquissimo uestræ domus instituto, semper obseruandum ducitis, ut quādiu stirps ac genus uestrum erit, ex eo semper aliquis sanctissimum illud Iusti nomen habeat & portet.

Hæc atque his similia stemmata quanquam uberiora sunt, & dictionis splendore maximo digna : tamen nescio quomodo tua illa tam Christiana facinora, tam insignia in Rempubicam merita, mihi quidem nunc ampliora uidentur, & magis (ut sic dicam) triumphalia. Quare cum has mihi partes demandaret patria, ut suam in amplitudinem tuam, eximiam pietatem atque obseruantiam, qualicuncq; possem oratione apud eandem testatissimam facerem, hanc potissimum causam suscipere mihi permisi, non modò, ut patriæ iussis obtemperarem, cui secundum Deum, & me & mea omnia debeo, sed ut conscientia tuæ rerūq; abs te, autore scilicet & adiutore C H R I S T O, præclarè gestarum, iucundas etiam & suaues recordationes darem. Rem quidem audacem fortasse, & quæ re uera sit supra huius captus atque ingenioli uires, (sumus enim omnibus eloquentiæ præsidij uacui) sed ad quam sustinendam, tamen qualiscuncq; facultatula, saltem ardenti pietate suppleri queat.

Nam

Nam audaciam, si non alio, certè hoc nomine celsitudinem tuam boni consulturam spero, quia si patriæ, quæ me tanquam spectatum in aliquo numero habet, licet nullo merito meo, si eius inquam tam pio in amplitudinē tuam studio, pro mea virili obsequutus non essem, nihil causæ erat, quin rusticæ cuiusdam ingrati-
tutinis nomini meo labes inureretur, id quod dedecorosum, & ad famam nimis sordidum, mea quidem sententia fuisset: nemo enim mihi illud non occinebat, fidei esse, pietatisq; se uel qualicunque modo memorem ac gratum declarare: esseq; aliquò prodire tenus, si non datur ultra.

Me itaq; quantum per imbecillitatem & tenuitatem licuit, accinxi, ut communi omnium uoto, & publica uoce, tibi patriæ parenti desideratissimo felicem istum reditum gratularer, & gratias agerem, quàm possem maximas, pro tanta tuorum erga omnes meritorum magnitudine: Quorum memoriā à nobis quò diligenter ac piè colī ostendam, dum eorum aliquot commemorare iubeor, (neque enim omnia quisquam posset, quamlibet in dicendo exercitatus) te quæso humanissime Pater, ne me assentatiuncula gratiam tuam ulla aucupari quærere putes. Nihil enim sum dicturus, quod non tam certum sit & confessum, quàm quod ipsis usurpamus oculis. Quodq; tibi non ita propriè tribui debeat, ut alijs eodem modo tribui possit nemini. Nam quòd modestia tua ab istis ingenijs plurimum abhorret, quæ quibuscunq;

c

buscunq;

buscunq; possunt artibus, auram popularem captāt,
 & uentosæ (quod Flaccus ait) suffragia plebis ue-
 nantur : & nos multo plus ab eo absumus, ut in cel-
 situdinem tuam ornamentum aliquod conferre pos-
 simus; sed imitanti deū tibi, qui ante omnia intimos
 cordium recessus penitus introspiciebat, atq; obser-
 uans, ad omnia facile conuiuet, dum nequid ibi ma-
 læ mentis, maliq; animi subsidat, hoc ipsum audere,
 tuorum tam non uulgariter pie sedulitati indulgeas,
 eorumq; nihil malis affectibus cedas, necesse est. Pre-
 fertim quando efferuescenti lætitia nos sic efferri faci-
 le animaduertis, quasi in peccatū impingere hic nus-
 quam possimus. Quanquam bone deus, Quid est,
 quur hanc aut temeritatis, aut adulationis suspitio-
 nem à nobis amoliri tantopere laboremus? Cum de
 laudibus uiri absolutissimi dicturi, nihil aliud, quàm
 dei in eo dotes, & mirifica simus admiraturi dona-
 Est enim deus, id quod non potes sapiētissime pater,
 quin maximè lubens audiendo agnoscas, cui quic-
 quid est in hac mortali uita boni, acceptum prorsus
 uni referendum est. Deus est inquam, qui Franciæ
 terræ, imo uerò orbi ipsi Christiano, per te plura, his
 quidem temporibus præstita uoluit, quàm per ordi-
 nis tui alium quenquam, etiamsi non inuiti fateamur
 ac concedamus, esse in Francia ualde multos, qui &
 consilio, & autoritate, & uirtute, egregiè præter cæ-
 teros polleant.

Primum enim cum felicitis memoriæ illustrissima
 princ

principe Lodoica Francisci nostri regis matre, quæ id temporis, absente & captiuo filio, regni huius gubernacula tuis, tuiq; similium consilijs, & uigilanti prudentia freta sapientissimè tenuit, fatales Anglorum in Francos simultates prorsus extinguens, fœdus cū illis apud Condriacum nostri eiusdem regis nomine, tam sanctum & inuiolabile icisti, ut ex eo tempore, tam luculenta sit Anglorum regis erga nostrum, contraq; nostri regis erga illum beneuolentia, ut si germani fratres essent, nec certior inter eos, nec firmitior, nec syncerior charitas esse posset, id quod nemo nescit, qui modo uiderit, aut certe audierit, quàm amanter, quàmq; cupienter uterq; quoties uisum est alterum interuissit.

Deinde quum Rex Christianissimus, apud Papiam à suis quibusdam, per diu conceptam proditorem nequiter desertus, (aluntur enim facile in quauis regione perfidia & impietas) in manus Cæsaris uenisset, & ob eam causam metus & periculum foret, necunde in Gallorum fines incursiones fierent, neue nostri milites in patria etiam ipsi hostilia facerent, (quid enim tam insigni clade accepta, non timendum erat inuidiosissimo Franciæ regno?) Hic tu cū paucis, Franciscæ clarissime, Francisci regno ita prospexisti, ita omnibus reipublicæ membris sapienter consuluisti, ut nec tumultus aliquis in Gallijs, nec ulla nouarum rerum molitio usquam coorta sit. Sed in tam aduerso tempore religiosius etiam quàm

c 2 antea,

antea, sese omnes in officio cōtinuerint. Quo factum est, ut hostis alioqui uictoriæ successu elatus, & ferox, (quam tamen propemodum citra puluerem, corrupto exercitu nostro, utcunque consequutus erat) cum de nobis prorsus actum esse speraret, diuino beneficio, & tua opera, Gallias tam confirmatas, tamq̃ pacatas uiderit, ut se amplius mouere ausus non fuerit. Tanti retulit in tanta turbulentissimorum temporum difficultate sanctè & prudenter Francicam rem publicam administrasse. Enimuero nunquā in Francia (quod quidem memoretur) nec legibus auctoritas maior, quā tunc, nec magistratibus reuerentia amplior constitit: Cum nec secures intentatæ, nec fascium terror ullis usquam incussus sit: qui & infrenem male cogitantium, & pestilentium hominum libidinem cohiberet, & militarem licentiam coherceret. Quin ut maximè comperirentur paulo ante nōnulli, qui de multis seditiosè, sed nō palàm queri auderent. Ita omnibus expletus est animus, sic ordo & populus Gallicus passim accepti sunt & habiti, ut ne uincientium quidem hostium mutatam secum fortunam esse uellent.

Ad hæc cum Cæsar ipse regi nostro, quem id tempestatis, occulto quodam dei consilio in potestate habebat, (nam fatorum malignitate & iniuria id accidisse profiteri, aut credere, Christianis religio est) Quum ergo is tunc regi nostro iniquissimas pacis conditiones proponeret, & eo pacto Gallias circuncidere

dere, pariter & imperium suum ita propagare cogitaret, ut Franciæ imperio plurimum detraheretur, tu ad illum legatus in Hispaniam missus, diuina quadam ratione & arte perfecisti, ut necessitati (aduersus quam ne dii quidem pugnant) ita paritum sit & seruatum, ut florentius etiam & stabilius, cunctisq; inimicis formidolosius Gallicum euaserit imperium, restituto in id sine bello ac fraude Rege Christianissimo, & huic germana Cæsaris ipsius sorore Helionora, in auspiciatissimum matrimonium data, uia nimis rum ad firmam duorum illorum potentissimorum totius orbis monarcharum concordiam diuinitus inuenta: Et breuiter re ita per te composita, ut & Francisci regis pudori omni ex parte optimè consultum sit, & liberi eius, quibus ad fidem promissorum acceptis obsidibus, eum Cæsar dimiserat, sint & pietissimo eidem parenti suo, & Franciæ ipsi restituti, nec tantillum interim eo nomine terræ Franciæ ditioni Imperio ue decesserit. Qua prudentia & dexteritate quid præstantius, quid optatius esse poterat? Postremò sic reconciliatis æmulis Christianorum monarchis, sic stabilita inter eos pace, sic pacato orbe, sic ab imis usque radicibus conuulsis odiorum intestinorum seminibus, quo pacto tandem labore tuo ornatum amplificatumq; est idem Franciæ imperium? Iam hoc scilicet attingendum uidetur.

Quod igitur decus, quæ dignitas, quæ gloria Fræciæ regno maior optanda uidebatur, quàm ut in Fræ

c 3 ciam

ciam, ad Christianissimum Regem summus C H R I
 S T I uicarius honoris causa adueniret? Quæ uerò
 iustitiæ coniunctior locupletatio? Quis ab omni in-
 iuria alienior auctus eadem Franciæ contingere po-
 terat, quàm si à præpotenti aliqua familia optimæ di-
 tionis magna ei accederet succelsio? Ergo cum sum-
 mo pontifici Romano magnæ solitudini esset, ne
 florentissima illa Florentinorum Medicum familia,
 unde ipse paterno genere ortus est, nobilium & præ-
 clarorum ingeniorum nuper benigna atque indul-
 gens altrix, nunc autem maribus liberis defecta, ne-
 gligentia ulla sua aut intercideret, aut ad immerentes
 perueniret, (Eius enim interest uel maximè, ut in
 Christianitate potentissima quæq; domus stet ac ma-
 neat, nedum optimæ ac beneficentissimæ gentis suæ
 integer status conseruetur) ergo memori illius ani-
 mo, & uetus Franciæ regnum cum suis gentilibus
 hospitium, & singularia ab illis quum in hos ipsos,
 tum in sedem apostolicam merita obuersata sunt, ut
 Christianissimum Regem omnibus anteponeret, abs-
 quo natu minorem filium, Aureliorum ducem pete-
 ret, cui unicā illam paternæ domus hæredem, Vrbi
 natiumq; ducem rectè collocaret. Quod ipsum Chri-
 stianissimo quidem Regi tam gratum fuit, ut & gras-
 tias immortales egerit, secq; beatissimi Papæ causa
 nihil nō facturum ex animo promiserit, seu quia res
 erat planè digna, ad quam adijceret animum Rex,
 seu quia maiorum uestigia insistens, qui semper de
 Romana

Romana ecclesia optimè meruerunt, sanctissimum illum patrem omni obsequio officioq; demereri cuperet. Sed incredibili cupiditate ardebat Rex, ut cum illo sibi ex animi sententia congredi ac colloqui liceret. Quod (sicuti sparsus est rumor) nonnulla haberet, sed ita sit, necne, tu optimè omnium nosti, amplissime antistes, qui Regis ipsius consilijs intimus es. Illa ergo conueniendi pontificis regem cupiditas incendebat, quod (ut dicebatur) is quædam haberet ad Gallicanæ ecclesiæ statum pertinentia, de quibus ad eum coram, arbitris omnibus procul amotis, referre uellet: neque enim dubium est, quin magna cautione opus sit, ut in hodierna ecclesia omnia, olim quidem bene ac sapiënter constituta, nunc autem dierum luxu, adeoq; omni uitiorum genere, alicubi etiã factiosis & damnatis erroribus corrupta labefacta: taq; sublati de medio sine tumultu & seditione, nequitia ac scelerum uelut scatebris & fontibus, rectè atque utiliter corrigi restituiq; possint. Cæterum nimium multæ, & cæ oppidò legitimæ causæ obstabant, cur ad summum pontificem Rex tam procul extra ditionis suæ fines tutò non iret: nec si id posset, ut nunc sunt res, tamen ipse deberet. Porro credi interim par non erat, iuxta ferè omnium opinionem, pontificem in Galliam uenturum: Certè quidem paucissimos fuisse constat, qui hoc inducerent in animum credere, factũ iri, ut uel tantisper summus pontifex ab Italia discederet, quin non defuere, qui alios

c 4 spon

sponſione laceſſiuerint, ni is ab Gallijs certè per hæc
 tempora prorsus abſtineret. At rex tamen ad te inter
 rim reſpiciebat. In te unum hanc difficultatem reclina-
 bant : cuius in rebus gerendis felicitatem, magno
 Franciæ bono toties expertus eſſet. Hic ergo tu teſta-
 tiſſimo teſtatiſſe feciſti Frãciſce generoſiſſime, quàm
 nobili & excelſo ſis animo. Negotiũ enim hoc to-
 tum quamlibet difficile : arduum, laborioſum, quan-
 do regi ita uidebatur, ad te recepisti. Et Rhomanam ſta-
 tim proſectus, illic intra paucos dies aperte declara-
 ſti, homini homo quid præſtet. Quippe qui honorifi-
 centiſſimæ ac magnificentiſſimæ legationis munere
 fungens, rem eò uſq; perduxeris, ut ſummum Pon-
 tificem, uniuerſamq; Rhomanam curiam in Franciã
 ipſe adduxeris, tantaq; uirtute inuidiam ſuperaueris,
 ut qui audacem inceptiõẽ tuam dixiſſent, hi nunc
 quaſi attoniti, ita te mirentur & ſuſpiciant, ut magnũ
 Galliarum decus, magnum ſeſis rebus auxilium te
 eſſe fateantur, ac palam dictitent. Quod ipſum cui-
 denti argumento eſt, apud alios laudes tuas, quàm
 antea eſſe nunc uel infinito maiores, neque id quidem
 iniuria. Nam quod apud Francorum regem, eximia
 & ſingulari autoritate ſis, id tibi cum alijs non paucis
 regni proceribus commune eſt. Quod uerò eidem
 regi ita charus ſis, ut nihilominus apud Cæſarem,
 apud Anglorum regem, deniq; apud ſummum Pon-
 tificem Rhomanum tanta flagrare gratia poſſis, ut
 quicquid opus & neceſſe ſit, ad utilitatem ipſius re-
 gis noſtri

gis nostri, cuius nomine oratorem agas, ab illis quidem omnibus feliciter cōsequaris : Pontificem etiam ad eundem regem colloquendi caussa in Franciam ab Italia, & ab urbe gentium domina, uel inuitis atq; frementibus omnibus inuidis, quanlibet pollentibus & opulentis, maximè lubentem ac lætum adducas. hoc scilicet abundè declarat, uirum te tantum esse, ut de ijs quidem, quæ in uires humanas cadant, nihil prorsum quantumuis difficile sit, quod si ad te receperis, effectum dare non feliciter possis. Quam equidem laudem, tam singularem, tamq; ingentem existimo, ut mihi omnino uidear, nihil tibi quicquam nimium tribuere posse.

Etenim cardinalem Gallum studio & autoritate, atq; adeò orationis illicio Rhomæ tantum ualuisse, ut præter omnium spem id assequutus sit, quod ne ipsi quidem alioqui pollentissimi Christianorum reges, si per se id essent conati, (certe ut opinor) exorassent: Quantum id tibi amplissime antistes, nisi triumphorum eorundemq; pulcherrimorum operum omnium, quæ ab hominibus esse possint, numero ac loco est, te tuo Marte (ut sic dicam) id est tua unius uirtute & opera perfecisse, ut summus Pontifex, CHRISTI optimi maximi in terris uicarius, & totius orbis supremum caput, se tibi ipse totum, in ea quæ principis tui nomine peteres, concreditum, in tantum tradiderit, ut cum probè sciret ab infestis-

d mis

mis prædonibus, & Barbarossa nobilissimo & crudelissimo barbarorum pyratarum duce atq; imperatore, mare hoc nostrum tantum non obsideri, Cum illud compertissimū haberet, Insubrum ducem magno regis nostri contemptu ac contumelia, occidendo crudeliter nobili uiro, quem in Italiam ille etiam legauerat, rem contra fas & ius omne gentium talem designasse, qualis olim fando uix unquā audita est, ut scilicet ea res flamma esse possit & fax cruentissimi alicuius belli. Cum essent præterea, qui eum satis admonerent, Cæsarem mali quippiam suspicaturum, eoq; iniquissimo animo laturum, si ad regem ipse in Franciam ueniret, imò cum iam rumor dissipatus esset, si id faceret, Cæsarem nescio quid interminari: denique cum uel in urbe ipsa rem ad tumultum & seditionem spectare sentiret, si horsum inde proficisceretur. Quid pluribus immoror? Quum ex omni parte inquam, atq; adeò omnibus modis, ut impederetur ac retineretur ipse, laborari, diligentiamq; omnem adhiberi uideret, & quod pluris est, nihil ipse esset indigens regis, ut qui Carolum Cæsarem ad omnia paratissimum semper habuerit, tamen prohiberi non potuit, quin tantum fidei & honoris tibi habuerit, ut tuo ductu tuisq; auspicijs in Galliam ad regem nostrum accesserit.

Potest ne quidquam tam magnificè dici, quin id laus ista multo superet? Accessit enim, non quia rebus aduersis urgeretur, aut de sede sua eiectus esset,
(quæ

(quæ caussa olim destitutos aliorum auxilio pontifices Rhomanos, refugere ad Gallorum regem non semel coëgit) sed quia optimis rationibus, & admodum tempestiua comitate tractatum eius animum in Gallorum regem ita conuertisti, ut quocunque eum ipsius regis gratia, etiam si aliò ducere uoluisses, uenire ille nec grauatur nec cunctanter sibi permisisset. Tam gratiæ beatus, tamq̃ felix primigenij ecclesiæ Rhomanæ filij commendator apud summum Pontificem esse potuisti.

Et mouerat hunc quidem, nec leuiter Cæsarea maiestas, quam eidem Bononiæ inter alia dixisse accepimus, Franciæ regem ad illum legasse uirum inter paucos bonum & sapientem, dignumq̃ cui quiduis crederetur. Id se compertum habere, sibiq̃ rem tecum oppidò seriam aliàs fuisse, cuius testimonij auctoritate, & tanti principis tam certe beneuolentiæ significatione, quid ad magnam auctoritatem apud summum Pontificem consequendam optatius, quid ad ueram gloriam aptius esse poterat. Eius tamen successus omnino præcipuum in hoc momentum fuit. Nam qui fama duntaxat, & regis ante aliquot annos, quum scilicet in augustissimum cardinalium ordinem cooptatus es, tunc etiam imperatoris commendatione apostolicæ sanctitudini insinuatus eras, ubi ea te propius, & de facie nouit, ubi uultus totiusq̃ corporis habitum, ubi orationis tuæ prudentiam & sinceritatem animaduertit, ubi omnia in te satis explorata, satis

d 2 tisq̃

tisq; spectata habuit, sic in te penitus affecta est, ut audita sit, quum apud amicos diceret, eum te esse, cui se & sua omnia committere non dubitaret, quo etiam iudicio quid tibi maius aut felicius contingere potuisset?

Nec uerò falsa interim, neq; iudicio neq; opinione fuit, quò admirabilior sit interim felicitas tua, Amplissime Pater, siquidē etiam supra uota, omniumq; expectationem illi apud Regem successerunt omnia: ut non minus honorificum, nec minus graue illud de te ab ea testimonium celebretur: Ferunt enim pontificiam sublimitatem Malsiliæ apud amicos tanquā gloriatam, quòd suo iudicio errasset, quippe te in omnibus maximis & grauissimis rebus satis cognitū in primis, satis superq; probatum esse: neq; quicquā prorsus te Rhomæ sibi promississe, aut alio quo pacto dixisse, quo non etiam amplius quàm ipsa speraret, sibi eidem in Francia præstitum sit, & effectum datum.

Meritò id quidem: nam cum regio apparatu, & quū quanta maxima potuit ueneratione apostolicā sanctitatem regia maiestas excepit, & tanto statim honore affecit, ut illius ex fratre nepti, ex filijs suis unū dederit, in æternam Valesiorum cum Medicibus necessitudinem ac coniunctionem: Tum suasu tuo non beatissimam illam modò, (quam erat alioqui omni officiorū pietate demeritura) sed omnes etiam eius itineris præcipuos comites, ditibus atque opulentis

lentis muneribus cohonestauit. Quippe quæ (sicut de his audiuius, qui se hoc uerè ac certò scire profitebantur) thyra seu pontificia mythra, filoq; aureo intertextis, & antiquissimo artificio acu depictis tapetibus Papam donauit, mythra sexaginta, tapetibus quadraginta aureorum solatorum millibus æstimatedis: ut duo hæc duntaxat dona summam efficiant centies mille scutorum. Cardinalibus uerò, qui cum Papa aduenerunt, singulis auream pateram precij ducentorum aureorum solatorum. Et de opimis Franciæ sacerdotijs in annuos redditus mille scutata etiam singulis dono dedit. Quæ sunt annua triginta aureorum solatorum millia, ab illis uiritim percipienda ex aliquot abbatijs, quas à Franciæ cardinalibus mutuò acceptas, in eisdem liberalissimus Rex transulit, idq; te autore (ut dixi) & impulsore, omniumq; primo, abs quo in eam munificentiam duas ille abbatibus mutuatus est.

Quæ omnia quasi auctarij & corollarij cuiusdam uice ad splendida illa & sumptuosa accesserunt, quibus omni studio & alacritate magnificentissimus Rex aperte declarauit, quàm nihil omnium sibi omitendum duceret, quo sanctissimi domini Papæ optatum in Franciam aduentum ornatorem redderet, & splendoris ac dignitatis plenior.

Quid enim magnificentius illa nauium, paronum, triremium classe omnibus rebus regaliter instructa atque ornata, tum omnis generis serico, aureo etiam

d 3 panno

panno, ea certè trireme, qua summus Pontifex uehebatur, undiq; cooperta ac circumtecta. Quam classem, ei præfecto Albanie duce, uiro præter antiquissimas imagines, rebus quoq; præclarè gestis, & foecundis animi artibus maximo, & sanctissimo Papæ propinquitate coniuncto, in eaq; imposito ornatissimo Francie procerum agmine, Rhomam pontificis inde Mafsiliam deducendi ac comitandi gratia præmisit.

Quid præterea sumptuosius ac magis uisendum ingentibus illis ædibus & Basilicis, quas Mafsilie operosissimo artificio, & incredibili ad omnia commoditate, elegantissimoq; ac splendidissimo cultu, Rex ante in gratiam Pontificis exædificandas ac parandas curauit. Vbi illius beatitas cum suis, ubi Rex, Regina, Regij liberi, ita commorari, & in hospitio esse possent, ut nullo labore ac negotio, quasi sub ipsdem tectis, alij ad alios facillimè commearent. Et fieret ex omnibus quasi uita omnium gratarum propinquitatum ac necessitudinum, arctissimo uinculo inter se colligata ac coniuncta familia.

An uerò quicquam hæc ætas usquam uidit magnificentius, ac triumphis omnino plenius celeberrimo illo conuentu, quem in eadem urbe Christianissimus Rex ex uniuerso ecclesiastici ordinis, qui in ditione eius est, fastigio, ex uniuerso Gallicorum principum, & gentilium hominum flore, in comitatu habuit. Quum solenni pompa, religiosis ceremonijs, ordine pulcherrimo, heroico incessu, ad summum
Christi

CHRISTI uicarium, tanquam numen quoddam
 cœlitus demissum, pientissimè ac reuerentissimè ex-
 cipiendum uenit. Et deinde paucis post diebus, quum
 affinitatem cum illo iunxit, dato fratris illius filiae
 Vrbinatium duci, & inclytæ Medicum familiae hæ-
 redi unicæ, filio suo Aureliorum duce.

Vel ex hac unare coniectare licet triumphorum
 (ut sic dicam) admirabilitatem, qui & prius in aduē-
 tu pontificis, & nouo ingressu eius in urbem Malsi-
 liam, & deinde cum Rex ad illum accessit, postremo
 in huiusmodi cōcelebrandis nuptijs acti sunt. Atq; illud
 etiam omitto, quod clarissimi Franciæ optima-
 tes omnes ingenij & opum uires exeruerint ad festis-
 uissimas illas celebritates pro sua cuiusque portione
 condecorandas, inter se etiam certare uisi, qui quibus
 sanctissimi domini Papæ amicos, & terræ Italiæ pri-
 mores ampliore officiorum gratia & comitate prose-
 querentur: ut eminentissimus Franciæ legatus, to-
 tos etiam abacos argenteis uasis egregiè cœlatis refer-
 tos compluribus donasse dicatur, ne cui in hoc lau-
 dis genere cedere uideretur.

Nec illud (opinor) attinet commemorare, quod
 uel Rex ipse obseruantia in CHRISTI uicarium,
 & honestissima indulgentia, atque obsequendi gra-
 tia, suos omnes longè à tergo reliquerit. Posito in li-
 berrimo sanctissimi illius arbitrio, quidquid ipsi in
 Francia uideretur ac placeret: se enim in omnibus
 Regni & ditionis suæ finibus maxime lubentem in

d 4 eius

eius potestate futurum, & prouiso ut quum primum ille in Italiam reuigare uellet, omnia ad eum reducendum parata & adornata essent. Et cum omni honore, ac dignitate, omni obsequio ac comitate dimitteretur, & quidem omnibus sumptibus immunis pecuniam enim Regiam (Christo gratia) abundè satis esse, ad dissoluenda omnia, quæ beatissimo Papæ Malsiliæ expensa ferrentur.

Non igitur de nihilo est, quod apostolica sanctitas sibi nō uulgariter gaudet, tibi & uerbis tuis omnē fidem habuisse. Quin quàm multa concurrunt, amplissime antistes, quibus augurari licet, te in eiusdē, & Rhomanensis aulæ summum præcordijs intimè repositum sic esse, ut nulla sit unquam temporū iniuria futura tanta, quin in augustissimo illo & sanctissimo purpuratorum patrum senatu, Francisci cuiusdā à Turnone Cardinalis Galli, cum beneuolētia & charitate memoria semper usurpetur. Sicut iam planè certum est, Franciscum Gallorum Regem, in uiuentium pectoribus, & quidem ex omni natione, atque ordine, ijs uirtutum monimentis consecratum esse, ut nullum æui spatium hæc ita antiquare ualeat, quin eius regalis magnificentia & liberalitas, laudibus in cœlum iure ac uerè semper feratur.

Atque hæc ipsa sunt, quibus etiam tua uerior adeoq̃ omnibus partibus admirabilior est felicitas, quàm aut Dityli illius Atheniensis, qui tot honoribus sine offensione usus est, aut Quinti Metelli Rhomani

mani unquam fuit, cui quasi cuiusdam annuli fatalis beneficio contigit, ut summa sapientia summus senator, & clarissimus ciuis haberetur, & auspicio suo res maximas gereret.

Quid enim felicius sit, quàm securam ac tutam ab omnibus bellis, id est, ab omni malorum lerna requietem Christiano orbi peperisse? & sublati rerum perturbationibus summos Christianitatis principes, mutua beneuolentia, mutuoq; amore, mutuis officijs inter se arctius coniunxisse? Atque ita negotium cuiusq; egisse, ut eorum nemo non secum præclare actum existimet, & dicat: denique perfecisse, ut autore sanctissimo patre, in cuius uerba iurant, cuiusque pedes cernui exosculantur omnes Christiani principes, amica & bonorum omnium creatrix, ac propagatrix charitas & pax, inter eos quàm diutissimè ali possit?

Quis uerò eadem hæc ad totius Christianitatis commodum, honorem, dignitatem, pertinere neget? Siquidem nihil prorsus usquam est, quod Christianitatem æquè contamineat ac labefaciat, quàm existiales istæ inter Christianorum principes inimicitiae plusquam impiorum bellorum materies & seges. Contraq; nihil eandem Christianitatem tam prouehit atque ornat, quàm amica cum omnibus pax & unanimitas, & quidem quantumlibet magno redempta. Tum autem patere & sine Christianissimum Franciæ regnum pessundari, quantulum quæso ger
e mani,

mani, & puri putiq; (ut sic dicam) Christianismi in reliqua Christianitate, & quandiu permanebit: Cum extra Galliam unam, Christianus orbis hodie aut Iudæorum & Marranorum, quotidianæ uitæ consuetudine, aut pestilenti hæreticorum contagione, alicubi etiam Mahumetanorum commercio & usu, magna ex parte infectus & corruptus, aut ad detestabilia etiam flagitia, quarundam nationum propensione, ac quasi genij instinctu, foedè nobilitatus sit. A quibus omnibus Franciæ regnum (laus & gratia CHRISTO) immune est, & exemptum: Atq; ita exemptum, ut non alibi usquam gentium, nec religiosius, nec castius, ac sanctius pietas, leges, æquum & bonum colantur: nec alia sit natio (tremat inuidentiæ licet) aut CHRISTI reuerentior, aut simplicitatis ac candoris retinentior. Cum igitur christianitatis præcipuos monarchas, per quorum manus in nos à deo uel bona uel mala omnia immittuntur, inter se eò usque coniunxeris, ut & in altissima tranquillitate deo nostro seruiamus, nec capitales religionis nostræ inimici Turcæ, qui ex nulla re magis, quàm ex dissidijs nostris rem sibi faciunt, aduersus nos ausint quicquam amplius moliri, non Franciæ modò regnum, sed & uniuersus orbis Christianus tibi debet, quantum mea quidem sententiâ, expendi satis non potest.

Accedit, quòd idem Christianissimus rex, quum nullam uirtutem non magnopere exercet, antiquitatis

ratis literarum etiam studiosissimus, tum tuo maxime suasu atque impulsu, optimum ac doctissimum quenque sibi undique adsciscit, datque & præficit quibuscunque potest, & bonos pastores, & bonos rectores, magistratus non nisi probis & idoneis committens. Quo fit, ut latrocinia à quibus nihil hactenus usquam tutum fuit, iusta ac legitima seueritate compescantur, nocentes profligantur. Otiosis erroribus, & reliquis omnibus pestibus, quas bellum in genere solet, Galliae ubique liberentur: bonisque legibus, & utilibus institutis suus uigor reuocetur, inutilia omnia tollantur: salutaria sufficiantur.

Accedit, & quod idem florentissimus princeps instauratis ubicunque regnum obtinet, scholis, meliores & puriores literas tanquam postliminio reuocatas, magna alacritate restituit. Et Lutetiae trilingue collegium fundaturus, ac dicaturus, quo perpetua optimarum disciplinarum studia alantur ac prouehantur, inibi regio planè autoramento conductos magistros & professores habet, qui citra intermissionem publicè optima & pulcherrima quæque docent: unde tantum fructum quotidie hauriri uidemus, ut iam sit magnus in Gallijs hominum egregiè elegantèque eruditorum prouentus: quorum admiratione & laudatissimo exemplo euenit, ut uirtutum ubique & honestarum artium exercitamenta excitentur: ac iam aurula quædam bonæ spei affulgeat, Christianum orbem sensim tandem per dei misericordiam &

e 2 fauo

fauorem, his rationibus adductum iri, ut à tot indignitatibus & flagitijs desciscens, atque eo pacto tam pestilentibus ac pernitijs offendiculis abstinens, ad innocentiae & sinceræ pietatis studium perdetentim conuertatur. Quæ res si placato & nobis propitio reddito CHRIS TO, contingere tandem possit, O' uerè felix, uerèq; aureum quoddam alterum seculum. O' beatam te tali præfule ecclesiam. Et fortunatum in primis Franciæ regem, qui tam dextrum nactus sit oratorem, tam fidum legatum, tam intimum consiliorum autorem.

Feliciorem uerò antiquissimam & illustrissimam à Turnone familiam, quæ post tam innumerabiles heroas, quorum ea quoddam quasi seminarium semper fuit, & adhuc inter magnificentissimum dominum Claudium à Turnone, Viuariensem episcopum, de quo dubites, corporis ne, an animi præclaris dotibus ornatior, atque insignior sit, seu formosior etiam in uiridi senectute corporis, optimum habitum, & elegantissimam proceritatem, cum pari uultus humanitate & clementia, pari oris affabilitate & facundia coniunctam, seu potius admirabilem illius in omni functione prudentiam, incomparabilem in ecclesiam dei, in pias reparationes, ac sacrarum ædium elegantissimas refectiones beneficentiam spectes: ut hunc dignissimum censere possis, qui & ipse cardinalitio galero tecum coretur: inter hunc inquam, nunquam satis laudatum præfulem, & cæteros Tur
nonio

nonio genere dignissimos ecclesiæ antistites, inter
tot dynastas clarissimos, te tandem orbi optime Pa-
stor, non sibi modo ipsa protulit: Qui uirtute sola,
& CHRISTI fauore subnixus, per singulos uir-
tutum ac dignitatum gradus, tandem ad summum
Cardinalitiæ celsitudinis fastigium peruenisti. Vnde
clarissimis alioqui & illustrissimis Principibus meis,
nepotibus tuis tantum solidæ gloriæ accedit, ut iam
Turnonij nominis magnitudo sit tanta, atque eò
usque increuerit, ut non solum apud Gallos, apud
Anglos, Scotos, Germanos, Italos, Hispanos, Lusita-
nos, sed etiam apud Turcas, & Barbaros in pre-
cio habeatur, & maxima dignatione.

Neque uerò est Pater amplissime quod quisquā
hic mihi tuorū fata & casus acerbos obtrudat, quo-
minus gentiles tuos omnes, omni ex parte fortuna-
tos ac felices dicere liceat. Sit enim mortuus tibi, imo
Franciæ, Iustus ille, frater tuus, tam cordatus uir
Princeps, tam constans iustitiæ uindex, tam acer ho-
noris Franciæ propugnator: Pro patria enim, &
pro Christianissimo Franciæ regno mortuus est in
acie, cum Lapalicio, Tremolio, Suffortio, ducibus
præstantissimis. Gesserat honores, equitum turmæ
meritissimò præfectus. Prouincias magnas admini-
strauerat: Tam gratus omnibus, ut eum tanquam
parentem colerent ciuitates: tam charus Regi, ut ab
eo in amplissimum ordinem, & collegium, cui nomē
à diuo Michaele inditum est, cooptatus, & conchus-

c 3 lato

lato torque honoris causa ab eodem decoratus, inter maximos regni sui proceres haberetur. Mortuus est, quid tum postea? In summa eademque honestissima gloria uixit, in summa eademque honestissima gloria mortuus est.

Turnoniæ hoc gentis proprium est, pro patria, & Christianissimi Regni statu tuendo, ac facto te-ctoque conseruando, uitam ipsam, nedum rem & facultates exponere. Quod ipsum quum tam multi è sanguine uestro olim, tum his annis, & Iustus ipse tuus frater, & Antonius atque Ioannes eius elegantissimi atque nobilissimi liberi, equitum etiam duces lectissimi, magna alacritate præstiterunt, quos idem bellum, sed non eadem pugna, cum Lautrecio Imperatore confecit, fato quidem, prope dixerim, crudeli ac diro, ut mortuo optimo & patriæ maximè necessario parente, non ita multo post, necesse fuerit accidere, ut morerentur eius filij, summæ spei iuuenes, alterque Turnoniorum, alter Arlentianorum princeps. Qui bellicis laudibus inhiantes, iam ea uirtutis & strenuitatis documenta dederant, ea ueræ nobilitatis specimina ediderant, ut si deus eos s. perstites esse uoluisset, dubium non sit, quin magnæ in Francia prouinciæ iam eis traditæ essent. Sed in tam iusto bello, in tam pia & honesta causa, pulcherrimū erat patris factum imitari, & tam excelsa uirtute æternam gloriam promereri. Tum CHRISTVS dominus & Deus noster orbi declaratum uoluit, Turnoniam domum

domum sibi esse tanquam peculiari curæ, siquidem quos egregiè præter cæteros amat, hos aduersæ fortunæ procellis subinde solet exercere: sed ita, ut quum deprimere uelle maxime uideatur, tum maxime euehat. Id quod in uobis Franciscæ illustrissime, ipsa re testatum fecit. Quis enim antea unquam magis in excelsio uidit Turnoniam domum? Tuo utiq; merito pater amplissime, qui in celsiora peruenisti, quàm gentilium tuorum adhuc alius quisquā. Porro quod ad stirpis sobolem pertinet, sunt alij tibi (Deo sit laus) satis multi fratris filij, qui nobis auita decora referre iam atque æquare cœperunt: ut in ijs quidem, qui ad ecclesiasticas functiones & dignitates uocati sunt, obseruandus in primis D. Carolus à Turnone Viuariensis ecclesiæ pastor designatus, uir qui præter excellens ingenium, & minimè prostritam eruditionem, & raram quandam animi prudentiam, atque in rebus gerendis dexteritatem in uenerabili antistitio, & in summo honore, quo apud celsitudinem tuam utitur, ea etiam est morum suauitate & comitate, ut nulli non se affabilem ultrò præbeat, & nihilo secius eo, grauitatem suam facile tibi probet: atque ita mira quadam harmonia, & in amplitudine humanissimus, & in ipsa humanitate amplissimus sit.

Et Iacobus à Turnone ornatissimus Castrensis præsul, quo omnibus modis reuerendo, tamen nemo est ad congressum ciuilior, nemo minus fastus

e 4 aut

aut supercilij præ se ferens, & quidem incolumi interim episcopali dignitate, quoties res postulat: Quo præterea nemo liberalior est & munificentior, quicquid suos benignius habeat, quicquid de alijs omnibus, in quibus modò eluceat aliqua uirtutis imago, melius mereri amet ac gaudeat. Hic & pietatem nulla in re non colit, & literis atque earum studiosis amantissimè fauet. Veram nobilitatem, adeoque ueram episcopi laudem in hoc sitam esse persuasissimum habens, si sanctissimo exemplo tuo, quamplurimos possit adiuuet, & ad rectè Christianeque agendum promoueat.

Ex his uerò qui seculo (ut sic loquar) relictis ac destinati sunt, est illustrissimus & omni laudum genere cumulatus eques lustus, dominus à Turnone, quippe qui tum politiore literatura, quàm ipsam cum natalium claritudine, nexu pulcherrimo copulauit, nobis (uti spero) bene fortunantibus superis, aliquem è ueteribus illis inuictissimis ducibus Romanis relaturus, qui non minus in disciplinarum studiis & peritia, quàm in armis præstantissimi fuere. Tum corporis eximio decore, & planè militari agilitate ac fortitudine, omnibusque animi laudatissimis artibus, & decora canendi gratia, famam opinionemque omnis primario uiro dignæ honestatis, iam in primo iuuentutis flore collegit, ut taceam, quod nuper in Franciæ Reginam, & cæteras heroínas eius comites, imò in omnes nobilitate ac dignitate insignes, qui Massiliam ad Papæ & Regis conuentum con

congressumq; hâc descenderunt, adeò magnificam
& splendidam hospitalitatem exercuit, ut in maximâ
& clarissimâ cuiusq; amicitiam & familiaritatem sese
penitus insinuauerit. Magnifica domo uestra omni-
bus nullo discrimine ad opiparas & adipales epulas
patefacta, ut intelligeret Christianissimus Rex, supe-
riorum à Turnone principum excellentis uirtutes,
quasi hereditario iure in filios, & nepotes penitus esse
transfusas.


Est item Arlentianus dynastes, generosissimus
adolescens, cuius egregia forma, ut nulli non admo-
dum arridet, ita spes atque uirtutis indoles tam bona
tamq; eximia est, ut sibi defuturus uideri non queat,
quin ætate paulo prouectiore, omnia adipiscatur,
quæ habentur amplissima. Adeò uiua in eo uirtutū
signa elucet. Quid igitur est, quod mortuorum des-
yderio tenearis Antistes cordatissime? non hi tibi fas-
tis esse debent? manent ergo, manent, æternitati con-
secrata Hectoridarum reliquie: Et Turnonia domus
clarissima prole exhauriri nescit. Quod si ex alijs
opum ac uirorum præstantia, etiam illustrissimis fa-
milijs ortos nepotes, ac neptes tuos percensere con-
tenderem, proculdubio & uires, & tempus, in medio
orationis cursu, me prorsus deficerent. Iure igitur, iure
optimo, Turnoniâ domum felicem prædicamus,
& beatam, quæ quum olim heroas cœlo & terris ge-
nuerit, nempe indigetes & diuos, Tum hodie, post
innumerabiles, atque adeò inter adhuc tam multos

f emin

eminentissimos in omni laude principes viros, te no-
 bis (quemadmodum dixi Pater amplissime) in me-
 diam totius orbis lucem ediderit, qui quicquid in
 Franciæ decus, & Christianitatis ornamentum stu-
 deas ac destines, quasi uirgula quadam diuina, id
 id consequare & efficias, mirâq; naturæ indulgentia
 par sis tam multiplici grauiſsimorum eiusdem Fran-
 ciæ negotiorum sarcinæ, quorum pars quantalibet
 alium quenuis facile obruat, te uix etiam leui sensu
 perstringat. Nec tamen ob istam tuam, uidelicet tam
 raram & incredibilem felicitatem, impie fremens in-
 uidia, obesse queat, quominus optatissimum atque
 iucundissimū tuum in patriam aduentum reditumq;
 boni omnes ex æquo tibi congratulētur, & primarię
 notæ & infimæ classis homines. Quare agite quicūq;
 Turnonica lilia, & leonem Hectoreum in imis pecto-
 rum recessibus inscripta atq; impressa gestatis: Agi-
 te, Franciscum florentissimum à Turnone Cardina-
 lem, quod felix faustumq; sit, pijs salutationibus,
 pijsq; aggratulationibus excipite, pro salute eius, &
 uitæ diuturnitate, & uota & preces certatim effun-
 dite. Ille Franciæ & Christianitati optimè cu-
 pere iudicandus erit, qui tibi omnibus
 modis suspiciēde Pater, læta &
 felicia omnia semper ad-
 precabitur, Dixi.

43

IOANNES PELLISSO CON
DRIACENSIS, SVO IN PRIMIS
charo discipulo, Claudio à Turnone,
Protomystæ Bellimontano,
S. D.



QVOD uulgo corporum parentes so-
lent, ingenue & liberaliter educate
adolescē, ut rerum à liberis suis nus-
quam non satagant, hoc mentium for-
matores facere perinde cōuenit, quasi
in hos iure culpa etiam conferēda sit, si eiusmodi non
euaferint alumni, ut in eis nihil omnino esse uideas-
tur, cuius illos pudere par sit ac pigere. Nam ut dis-
cipulis ad laudem & honestam gloriam aspiranti-
bus nemo non gratulatur contigisse bonorum mo-
rum artifices: Sic ipsdem honesta studia flagitijs & li-
bidine permutantibus, expensum ferri omnino des-
bet, quod protinus in crimen uocentur, qui eos insti-
tuerunt, quasi hos idcirco uitiorum ac nequitiae ar-
chitectos fuisse oporteat, quòd ab ipsis eruditi & edu-
cati, nihili sint & nullius pretij. Quo fit, ut in exigen-
do à discētibz officio seueriorem ferè docentem esse
deceat, quum ob id ipsum, quod dixi, tum quia
quemadmodū ex me sæpius audiui, exquisitissima
cura, & rara quadā diligentia istam ætatem curandā
ac moderandā etiā Christus præceperit, eoq; nimiū
grande piaculum committant, quicunq; adolescens
f z tibus,

tibus, ullo pacto sunt offendiculo : qui'ue ad bonam frugem illos, quantum possunt, non promouent : ut in quibus totius Reipublice Christianae sita sit reuera seges omnis, sic enim mihi loqui liceat. Quare hac consyderatione impulsus, qui tibi Bellimontane charissime, & morum & literarum præceptor non ita pridem fui, si officij mei esse putauì, ut quauis ex ephebis, adeoque sumpta uirili toga, ex imperio ac cura mea excesseris, ea tamen adhuc ego tibi occinam atque inculcem, quæ nisi in imis sensibus istis reposita, tenacius hæreant, nihil unquam magna laude dignum consequi possis : est, quod boni consulas, cuiusque nomine mihi gratiam habeas, quando quidem hoc non ob aliam causam facio, quàm ut nec tui oblitus ipse uidear, nec CHRISTO sedulitatem meam non probem, neque enim tibi propterea bene cupere desin, quòd custos & magister non amplius ad sim, nec paternum illum in te affectum isthinc semigrans posui, ut maximè contrà tibi fortasse uideatur. Agedum ergo, si uidetur, alumne dulcissime, animum mihi ad hæc aduerte, operamque rectè consulturo paulisper dato, necessitate quadam abs te quidem exorta, factum est, ut tuæ ipsius fiduciæ relinquendus fueris : periculoque tuo res omnis acta est, ne causificeris, non tibi prouidendum fuisse, nequa obloquutoribus ansa præberetur, quasi aut tu me, aut ego te perferre non potuerim. Quod ipsum si (ut opto) satis præcaueris, idque dederis operam, ut in
rectis

rectis studijs & bonis disciplinis feliciter nunc, aut
certè nihilo secius, promoucas, quàm cum tecum
essem, est procul dubio, quod tibi magnopere gra-
tuler, & mihi gaudeam, qui tibi pro eo ac debeo, &
opto & precor bona ac fausta omnia. Sin uerò pro-
fectus negligentem (quod omen auertat Deus) uul-
gares iste, ac perniciose corporis uoluptates, aut otio-
sa securitas te fortasse reddiderit. Istinc mihi (crede)
tristius molestiusue nihil renuntiari possit. Quòd
ego te Bellimontane generosissime per inclytum à
Turnone nomen, per eum, quo te Reuerendus pa-
stor Viuarien. Episcopus afficit, tam spectatū amo-
rem, quaeso atque obtestor, ne commiseris, ut uerè
dici usquam possit, in te erudiendo atque instituen-
do operam & oleum (quod est in prouerbio) pro-
fus mihi periisse. Nec te ideo ceperit discendi studen-
diue satietas, quia diues natus sis, quæ ad literatu-
ram segnitie atque incuria in eis ferè inesse solet, qui
in hac mortali uita, questu & lucro metiuntur omnia.
Etenim diuitiæ (ne hic erres) ac potètia merum nihil
sunt, si ad sapientiam conferantur: Quin ad bene
beateq; uiuendum, opulentia absque sapientia plu-
rimum etiam obest: cum sapientia uel sine ullis for-
tunæ bonis beare possit. Vt non iniuria celeberrimo
illi philosopho Thebano laudi daretur, quòd ingen-
tes thesauros (erat enim opulentissimus) in mare
abiecisset, ut liberius philosophari quiret: non sanè,
quòd sine re uiui possit, sed quia paruo contentus

f 3 iuxta

iuxta naturam optimam uiuendi ducem, animo sit à
 curis, & turbulentissimis illis sollicitudinibus, ac spi-
 nosis mortiferisq; cupiditatibus uacuo, eoq; optima-
 rum & saluberrimarum rerum scientiam ac cogni-
 tionem, si hoc studere ac laborare uelit, & uenari &
 assequi felicissimè queat, rem profectò, cuius compo-
 tes, qui semel facti sunt, soli sunt diuites, soli enim
 (quod ait Marcus Cicero) possident res & fructuo-
 sas, & sempiternas, soli aut rebus suis (quod propriū
 est diuitiarum) contenti sunt: aut siquid amplius
 optant, (quandoquidem optandi ac sperandi in hac
 quidem mortali uita, finis esse possit nullus) è tota
 rerum uniuersitate, duntaxat quod fieri, quodq; pa-
 rari & acquiri liceat, tam arduum nihil est, ad quod
 peruenire tandem non illi queant. Nec huic sufful-
 ciendæ assertioni longius petetur exemplum: Erit
 enim uel unus instar omnium hodiernus Franciæ
 Cancellarius, quem sua uirtus, ac sapientia ad sum-
 mos honores, ad summa rerum fastigia mirum in
 modum euexit. Modis ergo omnibus caueas Belli-
 montane charissime, obsecro, nequid tale in animū
 inducas putare, non esse, quamobrem semper discen-
 di studio ac cupiditate flagres. Hoc primum ac præ-
 cipuum est, quod abs te nunc efflictim contēdo. Pro-
 ximum uerò, ne sic animi ægritudinibus cedas,
 quia uotis tuis alicubi non admodum ex sententia
 respondeant omnia, ut tædio uictus, à pulcherrimo
 instituto desistas, & à uirtutis uia, quam bonis auis
 bus

bus ingressus es, pedem referas, quin ubiq; memineris, maximi illius Stoicorum principis Zenonis, quē ex Phœnicia nauigātem, quum naufragium fecisset, non protinus animum despondisse, sed consulto oraculo, quonam pacto reliquam uitam ducere beatam posset, id responsi accepisse ferunt, si mortuos uiuēs coleret. Hic enim sciendi cupientissimus, simul atque ænigmatici oraculi significationem coniectare posuit, nihil prius, nihil potius habuit, quàm ut ad omnes antiquorum sapientum perscrutandas atque excutiendas memorias diligentiam omnem adhiberet, Cratemq; philosophum multos annos audiret. Quæ res illi eò celsit, ut quum se nonnihil profecisse post arbitraretur, apud amicos tanquam gloriabundus diceret, nunquam se uentis secundioribus nauigasse, quàm quum naufragium fecisset, uoce quidem præclara & uiro sapiente digna, qua id egregiè declarauit, tædijs, molestijs, laboribus, & id genus bonorum ingeniorum remoris, nusquam prorsus cedendum, sed omni ope, ac toto conatu ad ea consequenda enitendum, quæ non felices modo nos ipsos, sed diuinos etiam (aut quod proximū est) diuinorum affines ac similes efficiant. Quanquam reuera quid tibi tantopere ægrè esse conueniat, cui & flos ætatis illibatus est, & ingenium contigit nequaquam infelix, id si diligenter exercere uelis, tum rectè docentium cura nunquam defuit. Ad hæc abundè suppetunt omnia, uel quorum desyderio,

f 4 sunt

sunt qui prope emoriantur, qui breuiter (ut semel dicam) perbeatus es, si tibi modo non defueris. Quare age Bellimontane, tam idoneum, tam opportunum, & commodum tempus bene colloces, facito. Elabitur enim, nec unquam reuocari poterit. Vide ergo dum concessum est, ne sic obuiam, sic paratam occasionem sciens prudensque negligendo prætermittas. Erit, quum aliter fecisse uoles, sed tunc lera nimis futura est poenitentia. Ipsa re compertissimum habes, quanta & uelit & possit in te ornamenta conferre beneficentissimus studiosorum patronus, noster Viuariensis antistes, in quo uno tuæ spes atque opes omnes sitæ sunt. Hunc omni pietate, omni obsequio, & reuerentia semper cole atque obserua: cuius eximia liberalitas non patitur te necessarijs egere, prolixius omnia etiam suppeditatura, si te modo sibi morigerum atque obsequentem in omnibus habeat. Ob oculos animi tibi igitur propone Bellimontane cordatissime, ad quâtos honores, ad quàm opima sacerdotia, ad quàm amplas facultates peruenies, si te Turnonio genere uerè dignum ipse præstiteris, & cum paribus tantum consuetudinem age. Quid enim tibi cum istis, à quorum congressu aut contubernio non potes melior nec doctior digredi? Suas sibi res illi agunto. Apud alios tibi diuersandum est, in quibus sit, quod meritò admireris, effingereque ac referre cupias. Verè nobilis egregius sit, oportet, nō istos de ima plebe imitari debet, quos nihil pudet ubiuis

ubiuis & apud quoslibet offendi ac comperiri, seu
quia cæteris prudētia & uirtute antecellere, seu quia
ex omni parte uitare debet, ne obscurorum & reie-
ctiorum hominum contagione quicquā labis præ-
stantiæ suæ contrahat. Impurorum enim & impro-
borum conuictus ac familiaritas in tantum pestilens
est, ut nemo iuuenis tam integer & bene moratus sit,
quin inde facile inquinari ac corrumpi possit. Habes
optime discipule, de quibus te rursus admonen-
dum putauī, quæ si grato animo accipies, & memo-
ria tenebis, certò futurum est, ut te nunquam pœni-
teat mihi dicto audientem fuisse: sin minus boni con-
sules, quod equidem non spero, tamen C H R I S T I
præcepto satisfecero, & meo in te animo ac studio mo-
rem gesserō, quandoquidem parte hac nihil morari
iam didici summam horum temporum ingratitude-
nem ac malignitatem. Dominus & saluator
noster Iesus sic te moderetur ac cōseruet,
ut te uirum magnum & pietate ac
sapientia insignem aliquādo
suspiciamus. Vale, Lu-
gduni decimo Ca-
lendas Au-
gustas.

M. D. XXXIIII.

f s

DE ILLVSTRI ET NON VVL
gariter crudito uiro, domino Protonota
rio à Vernada, Reuerendiſſimi domini
Cardinalis à Burbonio in inclyto Athanae
tenſi cœnobio uicario generali meritiffi
mo, Ioann. Pelliffo Cond.


Quod Vernadarum claræ ſpes altera gentis
Exempla antiquæ uincit amicitia,
Dum quencūq; poteſt, iuuat, hoc tenet inclyta uirtus
Vernadûm, ex omni tempore perpetuum,
Quod uiror ingenij, uiror eſt ætatis amœnus,
Et uetus in uiridi pectore uernat honos,
Vernat priſca fides, bonitas, ſapientia, honeſtas,
Tum, quod habet, doctis hoc habet atq; bonis.
Hoc eſt, quo felix gens eſt Vernadica, quodq;
Rebus ei in cunctis tempora uerna facit.
Vtq; hanc Burbonius pater, & clariſſimus heros
Inter honoratas eximiasq; habeat.
Tanti eſt, inuiſum in ſe non admittere faſtum,
Dignosq; officijs promeruiſſe uiros.
Omnia præſtat amor, non ui, aut furialibus armis,
Non compilanda plebe tenentur opes.
Nec prodeſt uili mercabilis ære ſatelles,
Non fauor, aut iunctis ſæuior ira minis.
Plurima poſſe cupis, fac quo pietate colaris,
Hæcres una tibi Regna beata dabit.

E R R A T A.

Pagina 20. linea 18. lege , qui de multis sedi-
tiose, &c. Pagina 28. linea 13. lege, quòd suo iudi-
cio nihil errasset, nam illic omnino nescio quo casu
omissum est uerbum, nihil.



005646051



KONSERVIERT DURCH
ÖSTERREICHISCHE FLORENZHIFFE
WIEN 1967